

欽
定
全
唐
文

欽定全唐文卷二十八目錄

元宗 九

禁刺史進奉詔

禁有司仗下獨奏詔

賜褚无量馬懷素詔

命選官僚詔

遣使賑恤河南道詔

勸選人勤學業詔

遞還張希嶠詔

金史卷之二十一
再減牧草稅詔

令孝經參用諸儒解易經兼帖子夏易傳詔

令諸儒質定孝經尚書古文詔

令孝經並行孔鄭帖易停子夏傳詔

答宋璟論修德緩刑詔

親慮囚詔

命諸州慮囚詔

遣官祈雨詔

集書目詔

罷請駕詔

皇太子入學慶賜詔

皇太子加元服慶賜詔

給復被災州縣詔

命兩京及諸州簡兵詔

褒姜師度詔

命張說修國史詔

答蔡孚請宣示御製春雪春臺望詩手詔

按理枉濫詔

貶蕭執珪盧季恂崔憬等詔

令州縣舉智勇詔

禁差民馬詔

加恩征行及當番衛士詔

禁逃亡詔

禁士女施錢佛寺詔

條制番夷事宜詔

釋放流徒等罪詔

誅康待賓免從坐詔

分散化度寺無盡藏財物詔

安置北州諸番詔

遣使宣慰百姓詔

慰問鹽夏兩州百姓詔

幸東都詔

朝官子弟先與閒散官詔

令州軍牒本貫放歸兵募丁防詔

禁僧道掩匿詔

誅王鈞詔

命張說兼領朔方節度詔

流裴景仙嶺南詔

賑懷州詔

增置太廟九室詔

禁殯葬違法詔

欽定全唐文卷二十八

元宗

九

禁刺史進奉詔

兩京來去乃是尋常緣頓所須皆用官物至於百姓縱暫
祇承處置有條不合辛苦其中侵擾莫非橫干或漁獵畜
養以將進獻觸途使役以徇聲名實由紀綱未樹教令不
行去年從京向都嘗亦處分蒲州刺史程行湛同州刺史
李朝隱陝州刺史姜師度至其州界咸有進奉惜其能官
善政乃屈法收情憶至於今豈能無怪冬中西幸不可踵

前其有輒進送及餉遺從官并別有煩擾者必科以法御史明加糾察隨事奏聞

禁有司仗下獨奏詔

有司及奏事皆合對仗公言比日已來多仗下獨奏宜申明舊式誥語令知如緣曹吏司細務及有秘密不合對仗奏者聽仗下奏

賜褚无量馬懷素詔

朕於百事考之無如文籍先王要道盡在於斯是欲令經史詳備聽政之暇遊心觀覽

命選官僚詔

修身貴乎慎始篤學在乎自幼朕諸子已各髫髻須聞詩禮宜於儒官中選德行耆宿三五人入閣教授

遣使賑恤河南道詔

朕自臨御天下介於人上萬邦在念百姓爲心慎日以兢因時載惕眷茲茂育寧忘鑒寐今歲河南諸州頗多水潦稼穡不稔閭閻阻饑方屬西巡更深東顧不加存問孰副優軫宜令工部尚書劉知柔馳驛充使往河南道巡歷簡問應免租庸及賑恤並量事便處分兼察人民冤苦官吏

善惡還日奏聞宋毫陳許之間遭滂尤甚其應緣賑恤宜倍優賞

勸選人勤學業詔

明經進階雖著於甲令儒道敦俗宜申於舊章其選人有能仕優則學所業不廢者當在甄收以示勸獎其能舊經外更業者準初出身例加階

遞還張希嶠詔

比每晝至側景夜至分宵期間政要用忘寢食但能會理不責其文貝州張希嶠上表詞義鄙淺有同諧弄據其不

遵理度固合與罪恐後來正直其謂我何故特矜愚不置於法且令河南府示語遞還本貫

再減牧草稅詔

調斂惡繁差科在簡每思量人賤畜之政輕徭薄賦之宜廢馬略配於諸軍課駒總留於畜牧則應稅之草不假循前今年所支已減舊數可於此數內更三分減一

令孝經參用諸儒解易經兼帖子夏易傳詔

孝經者德教所先自頃以來獨宗鄭氏孔氏遺旨今則無聞又子夏易傳近無習者輔嗣注老子亦甚甄明諸家所

傳互有得失獨據一說能無短長其令儒官詳定所長令明經者習讀若將理等亦可兼行其作易者兼帖子夏易傳共爲一部亦詳其可否奏聞

令諸儒質定孝經尚書古文詔

孝經尚書有古文本孔鄭注其中指趣頗多踳駁精義妙理若無所歸作業用心復何所適宜令諸儒併訪後進達解者質定奏聞

令孝經並行孔鄭帖易停子夏傳詔

朕以全經道喪大義久乖淳感之性浸微流遁之原未息

是用旁求廢簡遠及缺文欲使發揮異說同歸善道永惟
一致之用以開百行之端間者諸儒所傳頗乖通義敦孔
學者冀鄭門之息滅尚今文者指古傳爲誣僞豈朝廷並
列書府以廣儒術之心乎況孔鄭大宗固多殊趣諸生會
議曾無所申而推求小疵其細已甚聚訟之訛人無則焉
其何鄭二家可令仍舊行用王孔所註傳習者希宜存繼
絕之典頗加獎飾子夏傳逸篇旣廣前令帖易者停

答宋璟論修德緩刑詔

在於朕躬庶事戒慎天下或恐不稱所望卿爲朕耳目焉

上天降省良有以也深輔朕之不逮

親慮囚詔

朕以匪德嗣膺丕命雖日慎爲誠政期以康而天災流行誠或未感自孟秋在候雨澤愆足永念農畝用懷宵旰在予之責萬方何罪視人如傷一物增怵且夫修政之要恤刑之重雖得情勿喜寧僭無濫將恐此輩猶有冤人或傷於和而作此厲法惟明慎事藉躬親故爰加案省開其幽滯雖士師不寃時稱閱實而愚者自陷朕甚愍焉故屈常法特申寬典

命諸州慮囚詔

爰自春首頗憊甘澤眷茲近甸將損嘉苗人天謂何夙夜
增怵豈刑罰莫省罪獄其紛倘致吁嗟是生災亢故京師
囚繫親慮原減而郡縣狴牢將何愼恤平分之道載軫於
懷天下諸州見繫囚徒宜令所繇長官便慮有司即此類
作條件處分

遣官祈雨詔

今月之初雖降時雨自此之後頗憊甘液如聞側近禾豆
微致焦萎深用憂勞式資祈請某禱則久常典宜遵即令

禮部侍郎王邱太常少卿李嵩分往華嶽河瀆祈求

集書目詔

比來書籍缺亡后多錯亂者良由籍厯不明綱維失序或須披閱難可簡尋今麗正殿寫四庫書各於本庫每部別爲目錄其與四庫目不類者依劉歆七略排爲七志其經史子集及天文以時代爲先後以品秩爲次第其三教珠英既有缺落宜依書目隨次修補朕當披覽無使缺遺

罷請駕詔

東都道俗有來請駕者東西來去雖則爲常每歲來請豈

能無擾宜以禮告示仍於朝堂賜食即發遣并勅陸象先
莫令更相倣效

皇太子入學慶賜詔

儒道惟百王之政元良乃萬國之貞屬太學舉賢賓庭貢
士當其謁講故行齒臬所以宏風闡教尚德尊師宜有頒
賜以承光寵陪位官一品宜賜五十匹二品三品四十匹
四品五品三十匹六品七品二十匹八品九品十五匹緣
行禮及職掌者各遞加一等六品以下五匹爲等五品以
上十匹爲等坐主加二等學生賜物三匹待舉者及諸方

貢人各賜五匹

皇太子加元服慶賜詔

皇太子以守器之重有成人之量屬陽和肇歲甲子惟日
加乃元服循於舊章慶因雷洊歡洎雲上王公卿士中外
案寮布以慈惠廣茲頒賜應在會官一品一百匹二品九
十匹三品八十匹四品六十匹六品五十匹七品四十匹
八品九品二十匹諸州都督刺史上佐諸軍及副使亦同
在會例宜以當處物給

給復被災州縣詔

朕臨御寰極永思政理黃屋成屈己之勞紫宸多在予之念常恐微物或失大道未臻私奉睿圖載深寅畏去年諸處並多水旱歲儲不給生業靡安言念下人用增憂盱天下遭損州逋租懸調及勾徵特宜放免

命兩京及諸州簡兵詔

國家偃武教修文德百年於茲矣自運屬清平人忘爭戰俎豆之事嘗聞之矣軍戎之禮我所未暇且五材並用誰能去兵四方雖安不可忘戰故周禮以軍禁糾邦國以蒐狩習戎旅不教人戰是謂棄之宜差使於兩京及諸州且

揀取十萬人務求灼然驍勇不須限以蕃漢皆放番役差科唯令團伍教練辨其旗物簡其車徒習攻取進退之方陳威儀貴賤之等俾夫少長有禮疾徐有節將以伐叛懷服將以保大定功叶於師貞以宏武備應須集期及有蠲免所司明爲條制別作優異法奏聞

褒姜師度詔

昔史起溉漳之策鄭白鑿涇之利自茲厥後聲塵缺然同州刺史姜師度識洞於微智形未兆匪躬之節所懷必罄奉公之道知無不爲頃職大農首開溝洫歲功猶昧物議

紛如緣其中款足嘉委任仍舊暫停九列之重假以六條
之察舊藏過半績用斯多食乃人天農爲政本朕故茲巡
省不憚祁寒將申勸恤之懷特冒風霜之弊今原田彌望
畎澮連屬繇來榛棘之所遍爲秔稻之川倉庾有京坻之
饒關輔致珠金之潤本營此地欲利平人緣百姓未聞恐
三農虛棄所以官爲開發冀令遞相教誘功旣成矣思與
共之其屯田內先有百姓挂籍之地比來召人作主亦量
準頃畝割還其官屯熟田如同州有貧下欠地之戶自辦
功力能營種者準數給付餘地且依前官取師度以功特

金史卷之二十一
加金紫光祿大夫賜帛三百匹

命張說修國史詔

肇有書契是興簡冊所以彰乎得失示以勸懲非夫詳而有體辨而不華含陽秋之蘊總墳誥之蹟豈能光我司典崇其立言右羽林軍將軍攝御史大夫權檢校并州大都督府長史持節天兵軍節度大使燕國公張說多識前志學於舊史文成微婉詞潤金石諒可以昭振風雅光揚軌訓可兼修國史仍齎史本就并州修撰

答蔡孚請宣示御製春雪春臺望詩手詔

朕以聽政之餘因時遊矚觀古人之制度懷先王之卑菲
聊遇所覽直書其事雖文詞非麗亦不忘於言卿職在史
官君舉必記將以朕之素意頒示庶寮循諷表章益深祇
勉

按理枉濫詔

庸愚之人自犯踈網至於公憲誠則難容然服念泣辜昔
賢懿躅惟刑是恤不可暫忘如聞囚徒或有冤滯久在幽
繫情何以堪其外州已有使覆京城內宜令中書門下就
禁司按理如有枉濫隨事奏聞

貶蕭執珪盧季恂崔憬等詔

先王制法度立師長將以爲理也夫刺史者受方岳之寄爲吏人之表以宣法則以樹風教故得人則河潤九里京師蒙其福非材則虐流百城黎庶受其害所以漢宣云與我共理者其惟良二千石歟中大夫前守嵐州刺史蕭執珪通議大夫前守復州刺史盧季恂中散大夫前守銀州刺史崔憬等各藉階資謬居藩牧不率法度情匪在公憑此尸素黷其貨賄豈有奉條察之委居道化之先顓利無厭貪以敗類固上行而下效豈澄源以正本有覲面目實

虧風憲雖罪無所漏已置刑章而情頗難容宜從遠謫執珪宜除名配隸營府即差使所在馳驛領送至彼不得東西季恂可恩州司馬憬可施州司馬并員外置同正員即發遣赴任仍頒於郡國以勵在官

令州縣舉智勇詔

武有七德所以安人禁暴臣稱三傑所以戰勝攻取蜀乃一方之主尚得孔明齊爲九合之君斯繇管仲況宇宙至廣人物至多豈乏英賢無聞輶略蓋用與不用知與不知今邊境未清統邊須將頃林胡慙擾柳城非捷北虜勿驚

西軍莫振罪繇失律過在無謀曹劇不言寧知登軾之効
毛遂緘口豈彰處囊之奇長想古人是思擢士其有雖霑
簪紱猶晦跡於下流或蘊智謀尚沈名於大澤不加精訪
何以甄收其兩京中都及天下諸州官人百姓有智合孫
吳可以運籌決勝有勇齊賁育可以斬將搃旗或坐鎮行
軍足擬萬人之敵或臨戎却寇堪爲一堡之雄各聽自舉
務通其實仍令州縣具以名進所司遣立限期隨表赴集

禁差民馬詔

如聞天下有馬之家州縣或因郵遞軍旅即先差遣帖助

兼定戶之次緣被此百姓嫌疑多不養畜遂令騎射之士
頓減曩時益國富人何繇可致自今已後諸州百姓不問
有蔭無蔭若能每家畜馬十匹已上緣帖驛郵遞及征行
並不得徧差遣帖助若要須供擬任臨時率戶出錢市買
定戶及差重色役亦不須以馬充財數

加恩征行及當番衛士詔

諸府衛士役重人微既每征行又當番上言念艱辛更無
是過不稍優矜何以存濟自今已後征行及當番處衛士
除公乘配手力廳事及復身以外官人輒私抽役使宜令

御史金吾按察使嚴加採察

禁逃亡詔

四海清晏百年於茲雖戶口至多而逃亡未息良繇牧宰之任訓道無方不能綏撫令其浮惰且寰宇一統天下爲家去此就彼孰非州縣使其離鄉者則亦無改成其逋藪者何以居官遂令邦賦不入人僞斯甚政術不理豈過於茲宜令所司商量作一招攜捉搦法奏聞

禁士女施錢佛寺詔

內典幽微惟宗一相大乘妙理寧啟二門聞化度寺及福

先寺三陞僧創無盡藏每年正月四日天下士女施錢名爲護法稱濟貧弱多肆奸欺事非真正即宜禁斷其藏錢付御史臺京兆河南府勾會知數明爲文簿待後處分

條制番夷事宜詔

制國立軍以爲武備安人和衆諒在師貞必將簡其車徒務其蒐獮不教人戰何以訓兵今寰宇雖寧燧燔時警故設備邊之政更深用武之略其劔南磧西關內隴右河東北通燕薊旣接邊隅是防夷狄據山川險要量寇賊多少分置軍旅足成修備有事赴敵可以拉朽摧枯無事養人

可以拔距投石而將吏非謹甲兵不修加之侵暴仍且役使雖則屢提綱領然猶故忽科條豈法有未明將官無所畏永言此弊增歎於懷又諸道軍城例管夷落舊戶久應淳熟新降更佇綏懷如聞頗失於宜蕃情不得其所若非共行割剝何乃相繼離散既往者理宜招討見在者須加安全熟戶既是王人章程須依國法比來表奏多附漢官或洩其事宜不爲聞達或換其文狀乖違本情自今已後蕃臣應有表奏並令自差蕃使不須更附漢官雖復化染淳風終是情因本性刑罰不中心固不安其有犯法應科

不得便行決罰具狀奏聞然後科繩咨爾軍僚勉我王事
兵必須賈勇奮力馬必須芻牧秩養器仗必須磨礪糧儲
必須贍積馭蕃夷必須以威以恩誓將士必須以罰以賞
辨於旗物稱爾戈矛使有勇而知方將料敵而常勝所謂
文武並用國之大經團結十萬衆兵別令訓習分割數萬
匹馬皆有供須什物備陳行裝具足候時而動我武惟揚
俾夫涼風至白露下將以執有罪覆昏慝宏厥戎略振斯
天聲清彼四方期此一舉其諸軍官吏輒更私役兵及侵
漁一錢已上兼失偵候仍墮教習倉儲或乏器械莫修番

部不能安窮寇不能制有一違犯國有嚴誅事或未同仍令所司作條件處分

釋放流徒等罪詔

自昔明王恤人爲念朕君臨寓縣子育黎庶一物乖宜常切納隍之慮萬方有罪再軫泣辜之責故勸農務穡國政攸先捨過錄功帝圖惟永況麥風炎序梅律啟辰言念狴牢情深惻隱宜申緩獄之令以宥刑之澤其天下見禁囚徒犯流已下徒已上特宜免以常科並遣隨軍展效仍令所司明爲年限條例隨便近諸軍分配冀能竭力勉樹

勲庸其杖已下即令釋放使務農業

誅康待賓免從坐詔

蘭池胡久從編附皆是淳柔百姓乃同華夏四义康待賓等敢亂天常俱爲禍首驅率羣衆嘯聚沙泉使良善失業而兇渠逞志人祇發怒魁首者並自誅夷鋒刃揮芒陣敵者亦聞梟戮元惡既盡餘黨無多本是脅從初非爾罪今乃潛竄須示其誠朕亭育蒼生皆同赤子每一物之失所寧寸心之得安莫不念切在予情深責已故先之以德亦寬之以恩乃遣常侍趙元通又命御史大夫韋抗附以招

慰俱不稟承儻滋蔓繁多恐邊毗塗炭非願勤於兵馬蓋
須申於弔伐朔方軍大總管王峻隴右節度使郭知運等
虔奉廟謨恭行天討所有殺戮爰及俘囚或因戰敵相交
灼然好惡無辨驚波繇是共溺烈火所以俱焚自孽誰尤
欲逃何去已滅亡者其如咎譴未歸附者是可哀憐或反
側懷憂或嫌疑多懼宜開自新之命以矜莫大之罪其胡
賊及勾引諸蕃同叛逃在山谷沙藪間疑懼不出者並原
其罪宜令夏州都督陽欽明依前處分安慰仍以左監門
將軍安慶爲副依理宣慰量加招輯各令復業務使安存

訖奏聞若不順從猶持向背須別處分亦具奏來

分散化度寺無盡藏財物詔

化度寺無盡藏財物田宅六畜並宜散施京城觀寺先用
修理破壞尊像堂殿橋梁有餘入常住不得分與私房從
貧觀寺給仍令御史張樽與禮部侍郎崔據京兆尹孟溫
禮取元奏數揀京城大德戒行灼然者共檢校量事均融
處置訖奏聞諸州長官及按察司所察錢物以委州使準
此共勾當散配處分訖申所司

安置北州諸蕃詔

國家天覆萬方子育庶彙要荒所列並入提封日月所照
俱爲臣妾莫不熙我德澤納之仁壽神人以和鳥獸咸若
河曲之地密邇京畿諸蕃所居舊在於此自服王化列爲
編氓安其耕鑿積有年序而翻然造謀構此紛孽勞我師
旅擾其邊隅不思亭育之愛坐取滅亡之道官軍纔及一
鼓而潰雖肇其首謀則有元惡然率以從亂咸爲匪人朕
思宏其在宥之恩振以好生之惠伐彼有罪捨其脅從使
反側自安胡耆靡獲則壽張之釁爾實自取生成之德我
則有焉宜令朔方軍大總管兵部尚書王峻宣崇恩命示

以柔服諸軍戰士應須酬錄功勲及却投來吐渾党項左右廂降戶雜蕃并胡殘部落或善惡未分或久長取穩若須釐革一事已上並委王峻敘錄處置訖奏聞

遣使宣慰百姓詔

朕身居九重心在萬姓恐情未達下政或乖方頃者故命近臣分道巡撫爲屬農月且停使車今秋稼方收時亦將隙命中書舍人何鸞等宜所到之處宣慰百姓令悉朕懷其有水旱之州或須貸給不可遠更奏聞宜便量事處置征鎮之家各令州縣檢校優賞其中無兼丁存濟者仍加

賑恤

慰問鹽夏兩州百姓詔

如聞鹽夏兩州百姓及六州胡等被胡賊殺掠宜令御史韓朝宗皇甫翼齎書分往慰問便復損數其被損之家務令存恤應須給貸蠲免量事處置訖迴日奏聞

幸東都詔

王者觀俗以賦政考祥以省方必將協於人和而奉若天命朕祇承鴻業用康黎庶思振德以惠物豈勞人以尊己頃年關輔之地轉輸實繁重以河塞之役兵戎屢動千金

有費九載未儲懷此勞軫以增肝旻且夫苟利於物可隨
方而變通將適於人故因時以巡幸卜筮萬方之隩維嵩
五嶽之中風雨之所交舟車之所會流通江汴之漕控引
河淇之運利俗阜財於是乎在今欲省其費務以實關中
即彼敖庾少留河邑乘歲陽之吉展遊順之儀豈惟龜筮
不違故亦詢謀是協修五禮問百年車輿動而不勞玉帛
會而胥悅所謂先天以宏道因人以爲利也宜以明年正
月十五日幸東都

朝官子弟先與閒散官詔

如聞朝官子弟未曾經歷即坐要司及京畿并州縣理人
官或侍郎受財追遊怠墮或恣行決罰妄作奸非刑憲不
可徧矜父兄莫能訓導苟陷於法良軫於懷宜令本司及
州府長官按實驗察有此色并少年未諳時事可移與閒
散官

令州軍牒本貫放歸兵募丁防詔

如聞諸道兵募丁防年滿應還或征役處分及在路死者
不得所繇牒報本貫無憑破除仍有差科親鄰受弊宜令
今年團日勘責同行火隊的知實死即與破除自今以後

每有兵募丁防放歸令州軍具存亡夾名牒本貫

禁僧道掩匿詔

釋道二門施其戒律緇黃法服衆亦崇尚苟有踰濫是無
憲章如聞道士僧尼多有虛挂名籍或權隸他寺或侍養
私門託以爲詞避其所管互相掩匿共成姦詐甚非清淨
之意也自令已後更不得於州縣權隸侍養師主父母此
色者並宜括還本寺觀

誅王鈞詔

國之設法本以閑邪苟無所施雖立安用朕以寡昧纘承

丕業夙夜怵惕恐不克勝馭朽徒知其所危涉川罔知其
所濟是用寤寐永歎常思罪己冕旒不欲見其臧否黷續
不欲聞其是非隱忍含容十載於茲矣不能使令行禁止
訟息刑清家習禮讓之教人興廉恥之節此朕之不德也
河南府雒陽縣主簿王鈞貪殘其性暴虐其心輕侮我章
程殘剝我黎獻處事不遵乎法理黷貨不知其紀極此而
可恕孰不可容且輦轂之下事猶如此想於遠處人何以
堪然而當發生之時屬陽和之月朕情存惡殺不加殊死
且從杖罪以肅朝端可與朝堂集衆決殺自今已後內外

官有犯賄至解免以上縱使逢恩獲免並宜勿齒終身御史憲司職當推劾不存糾舉多有顏情網紀不施誰任其咎又府縣寮案上下相承犯法公然無聞按詰若或知而故縱即是職務不舉各自思審何以當官自今已後所進擬御史皆須歷職清白衆所推者不得虛相引進僥倖祈榮凡厥朝臣宜悉朕意

命張說兼領朔方節度詔

朔方之地雍州之域密邇關輔是稱河塞頃者胡孽爲寇擾其居人王師有征戎事斯大戍役之弊邊氓旣勤雖妖

醜底清而政理未洽不有經制曷云昭蘇且和衆爲武者
所以詰姦慝總軍命將者所以訓甲兵匪夫大賢孰允茲
任兵部尚書中書門下三品燕國公張說天與明秀自然
才傑光備九德宏宣七政爰掌邦理實爲國楨謀而必忠
言則無隱寅亮之美用熙帝載談笑之餘更陳戎備所謂
善行樽俎事立封疆宜以上台之尊遙統中軍之任可持
節兼知朔方軍節度大使餘如故

流裴景仙嶺南詔

罪不在大本乎情罰必在行不在重朕垂範作訓庶動植

咸若豈嚴刑逞戮使手足無措者哉裴景仙幸藉緒餘超
升令宰輕我憲法蠹我風猷不慎畏知之金詎識無貪之
寶家盈黷貨身乃逃亡殊不知天孽可違自愆難逭所以
不從本法加以殊刑冀懲貪暴之流以塞侵漁之路然以
其祖父昔預經綸佐命有功締構斯重緬懷賞延之義俾
協寬政之典宜捨其極法以竄遐荒仍決杖一百流嶺南
惡處

賑懷州詔

朕以懷州去年偏併不熟宜令刺史崔子源察審問貧下

不支濟者量加賑貸

增置太廟九室詔

朕聞王者乘時以設教因事以制禮沿革以從宜爲本取
捨以適會爲先故損益之道有殊質文之用甚異且夫至
德德謂孝所以通於神明大事之謂祭所以虔於宗廟國
家握紀命厯重光累盛四方繇其繼明七廟可以觀德朕
嗣守丕業祇奉睿圖聿懷昭事罔不恤祀嘗覽古典爰詢
廟制遠則殷周事異近則漢晉道殊雖禮文之不一固嚴
敬之無二朕以爲立愛自親始教人睦立敬自長始教人

順是知政以道存禮從時變特因宜以創制豈法古而限
今況恩以降殺而䟽廟以遷毀而廢雖式瞻古訓禮則不
違而永言孝思情所未足享嘗則止豈愛崇而禮備有禱
而祭非德盛而流永其祧室宜列爲正室將使親而不盡
遠而不祧廟以貌存宗由尊立俾四時式薦不間於毀主
百代靡遷匪惟於始廟所謂變以合禮動而得中嚴配之
典克崇肅雍之美茲在又兄弟繼及古有明文今中宗神
主猶居別處詳求故實當宁不安移就正廟用彰大典仍
創置九室宜令所司擇日啟告移遷

禁殯葬違法詔

如聞百官及庶人家殯葬頗違古則無復哀戚遞相誇尚
富者踰於禮法貧者殫其資產無益於死徒損於生傷風
敗化斯數尤甚自今已後送終之儀一依令式至墳墓所
仍不得聚飲肉食宜令所繇嚴加禁斷更有違者科違勅
罪

欽定全唐文卷二十九目錄

元宗 十

北巡祠后土詔

車駕次潞州慶賜詔

遣御史分巡諸道詔

令諸州置醫學博士詔

令太史修漏刻詔

幸河東推恩詔

禁大酺會人填溢詔

飭御史刺史縣令詔

賜奚契丹等絹綿詔

令御史分巡河南北詔

置判南曹官詔

禁僧道不守戒律詔

置勸農使詔

令河西隴右等處防邊詔

賜突厥袍帶詔

令蒲同兩州平糶詔

卹緣邊兵士詔

答源乾曜等請封禪手詔

答源乾曜等重請封禪手詔

報裴漼等請封禪手詔

允行封禪詔

將封泰山斷屠詔

禁濫借魚袋詔

定犯盜人刑法詔

賜兵士葬祭詔

量助長征家口營種詔

放免十二年以前積欠詔

戒州縣祇候御史詔

禁訴冤自刑詔

幸孔子宅遣使以太牢祭墓詔

巡理滯獄詔

禁左道詔

順時決獄詔

給年滿兵募程糧詔

遣官祭五嶽四瀆風伯雨師詔

遣使宣慰懷鄭許滑衛等州詔

遣使宣撫河南北道詔

令都督刺史更訪擇舉人詔

答寧王憲手詔

安存流民詔

貶陳州刺史李樂詔

賑給同鄜等州詔

緩逋賦詔

遣使宣撫河北詔

欽定全唐文卷二十九

元宗十

北巡祠后土詔

王者承事天地以爲主郊享泰尊以通神蓋燔柴泰壇定
天位也瘞埋泰折就陰位也將以昭報靈祇克崇嚴配爰
逮秦漢稽諸祀典立甘泉於雍時祠后土於汾陰遺廟歸
然靈光可燭朕觀風唐晉望秩山川肅恭明神思致禋敬
將欲爲人求福以輔外平合此神符應於嘉德宜以來年
正月北巡狩行幸至汾陰以二月祠后土所司準式

車駕次潞州慶賜詔

朕巡狩晉陽觀風問俗肆覲羣后存問百年諸侯待於境者抑惟故事今停蹕潞州勞以牛酒其外州刺史及迎駕父老道士僧尼等遠來至此頗亦艱辛宜併令預會刺史賜物四十匹父老已下各賜物三匹

遣御史分巡諸道詔

國之三典令于四方歲終則巡聽其獄訟頃因水旱貨食不足或徭稅徵逸多不折衷或租調蠲除事涉欺隱皆吏之不稱政之不修是用命茲使臣委其詳覆徐楚璧等並

清白自立茂有政聲必使事合權宜刑無冤濫不損於物
有益於公往敷厥休副茲推擇並可攝監察御史勾當租
庸地稅兼覆囚

令諸州置醫學博士詔

神農嘗草以療人疾岐伯品藥以輔人命朕銓覽古方永
念黎庶或榮衛內壅或寒暑外攻因而不救良可歎息今
遠路僻州醫術全少下人疾苦將何恃賴宜令天下諸州
各置職事醫學博士一員階品同于錄事每州寫本草及
百一集驗方與經史同貯其諸州子錄事各省一員中下

州先有一員者省訖仰州補勲散官充

令太史修漏刻詔

近日漏刻失時或早或晚宜令太史謹修盡職勿使更然如有愆違委御史彈奏

幸河東推恩詔

朕君臨宇內子育黎元豈以黃屋爲尊實以蒼生爲念何嘗不日旰忘食未明求衣雖身在九重而情存六合恐至道猶鬱大化未孚昨因展義河東祈穀膳上肆覲羣后親問高年舉滯賑窮旌善黜惡緝其隆典酌于古訓今省方

告至禋祀云畢思又庶官務崇簡易河南河北去歲水損人或竊盜吏或侵抑不防害馬何以安人或令御史分道案行量加賑給諸州府馬闕數稍多既令官填復須私備貧兵力致實以爲難宜令所司即勘會闕數與閑廐使計會取監牧馬充其行過處緣頓及營幕損百姓青苗並令本州勘以正倉酬直懷澤兩州已免地稅潞州太原府亦有給復其汾晉蒲絳同華京兆河南供頓戶並宜免今年地稅鄭衛雒相宜沁慈隰等州佐助夫役雖日不多終是往還辛苦各免戶內今年差科緣頓所築官牆內今並空

閑任本主耕種緣路州縣有表薦官僚及上書獻頌者中書門下審覆奏聞量加進賞發都簡試及諸色召募行從人遠將巡省須收才用並令所司即作條例處分内外官職田恐侵百姓先令官收慮其祿薄家貧所以別給地子去歲緣有水旱遂令總停如聞卑官頗難支濟量事優恤使得自資宜準元勅給其地子朱紫貴品皆豫考勞人臣事君忠無二節至如泛階溥及義取平均豈獨清官偏得減考自今已後如泛階應入五品以十六考爲定入三品以三十考爲定其有名賢宿德及異迹殊狀雖不逢泛階

或因選改之次年考與節限同者咸以名聞仍爲永例今之刺史古之諸侯會玉汾雎豫陪祀禮宜令中書門下商量奏聞方今萬類發生春事方起所司宜敬敷五教敦勸三農議緩刑獄禁傷胎卵罷妨農不急之務減額外不要之官各委長官量事處分宣示遠近副朕意焉

禁大酺會人填溢詔

大酺之會與人同歡或慮遠方觀者來往狼狽其四夜併宜開坊門府縣金吾嚴加捉搦

飭御史刺史縣令詔

如聞在外官人罕遵法式孤弱被抑冤不獲申有理之家
翻遭逼迫侵刻之吏務欲加誣州縣有好長官同寮豈敢
違法御史執憲綱紀是司多惜人情未聞正色內外同此
何致至公宜令刺史縣令嚴加捉搦御史按其有犯彈奏
賜奚契丹等絹綿詔

公主出降蕃王本擬安養部落請入朝謁深慮勞煩朕知
割恩抑而未許思加殊惠以慰遠心奚有五部落宜賜物
三萬段其中取二萬段先給征行遊奕兵及百姓餘一萬
段與東光公主饒樂王衙官刺史縣令契丹有八部落宜

賜物五萬段與燕郡公主松漠王衙官刺史縣令其物雜以絹布務令均平給訖奏聞

令御史分巡河南北詔

河南河北去歲雖熟百姓之間頗聞辛苦今農事方起蠶作就功宜令御史分往巡行其有貸糧未納者並停到秋收

置判南曹官詔

文武選人十月下解既逼銓注勘簡難周不能自親並委猾吏恣成姦濫爲蠹尤深自今已後兵吏兩司專定員外

兩人判南曹事每年選舉起五月一日所是文狀即預勘
責關簡判南曹官親自就覆每包攢作簿書對本司長官
連署印記不得委其胥吏勘責畢各具人數奏聞其判南
曹官所司即進名朕自簡擇

禁僧道不守戒律詔

緇黃二法殊途一致道存仁濟業尚清虛邇聞道僧不守
戒律或公訟私競或飲酒食肉非處行宿出入市廛罔避
嫌疑莫遵本教有一塵累深壞法門宜令州縣官嚴加捉
搦禁止

置勸農使詔

有國者必以人爲本固本者必以食爲先先王於是務其
三時前聖所以分其五土勸農之道實在於斯朕撫圖御
歷殆踰一紀旰食宵衣勤乎兆庶故兢兢翼翼不敢荒寧
頃歲以來雖稍豐稔猶恐地有遺利人多廢業游食之徒
未盡歸生穀之疇未均墾以是軫念臨遣使臣恤編戶之
流亡閱大田之衆寡至如百姓逃散良有所繇當天冊神
功之時北狄西戎作梗大軍之後必有凶年水旱相仍逋
亡滋甚自此成弊於今患之且違親越鄉蓋非獲已暫因

規避旋被兼并既冒刑網復損產業居且常懼歸又無依
積此艱危遂成流轉或因人而止或庸力自資懷土之思
空盈返本之途莫遂朕虔荷丕構子育萬姓立德非宜而
茲弊未革納隍馭朽實切於心既深在予之責思宏自新
之令其先是逋逃並宜自首仍能服勤墾畝肆力耕耘所
在閑田勸其開闢逐土任宜收稅勿令州縣差科徵役租
庸一皆蠲放若登時不出或因此更逃習俗或然非以爲
法且阻我誠信是紊我大綱爰及所繇須加嚴限且天下
風壤多有不同地既異宜俗亦殊習固當因利制事不可

違人立法宜令兵部員外郎兼侍御史宇文融兼充勸農使巡按人邑安撫戶口所在與官寮及百姓商量處分乃至賦役差科於人非便者並量事處分續狀奏聞務令安輯勿使勞繁當行賞罰之科各竭忠公之力所到之處宣示百姓達我勸人之心

令河西隴右等處防邊詔

懷遠夷納款附國家常事也邊塞嚴甲兵備軍旅本職也雖萬方和同不可薄其武備百蠻朝貢不可輕其疆場今年十月東幸維京西北二邊倍宜嚴警其河西隴右朔方

太原幽州平盧諸節度咸宜裹糧坐甲秣馬利兵明教隊
伍遠爲偵候使風塵預知邀截有所安我邊鄙威加戎狄
賞罰在茲各宜砥礪

賜突厥袍帶詔

可汗慕義向風益以嘉尚我國家金帛子女務通和親然
一爲婚姻將傳永久契約須重禮數宜周今來人旣輕禮
亦未足所以未定日月令其且還如和好不移誠信無改
凡有所請必當不違國家信若四時恩同天地一言則定
何誓如之必能結之神明彌表彼之誠契旣無猜阻任擇

其宜諸所有商量今已親語哥解更欲遣使恐致勞煩令
寄可汗錦袍鈿帶銀盤胡餅至宜領取

令蒲同兩州平糶詔

蒲同兩州自春偏旱慮至來歲貧下少糧宜令太原倉出
十五萬担米付蒲州永豐倉出十五萬担米付同州減時
價十錢糶與百姓

卹緣邊兵士詔

爲國之道莫不欲家給人足令行禁止而族談者苦邊疆
之戍役偶語者傷戶口之凋殘且夫懷土重遷人之常性

離邦去里孰無其情或委非其材或政非其要致令父不
保子兄不寧弟并邑有流離之怨道路有吁嗟之聲靜言
思之良可嘆息是以晝分不食夜不安寢庶息彼弊政就
此涼風故發使車以巡郡縣其承前處置不便不利於人
即宜當處商量隨事釐革其緣邊兵士等或遠辭鄉壤久
事戎旃饑寒而衣食不充疾病而醫藥不拯邊烽忽警將
何以堪宜令使人各親勞苦其有年齒衰暮或抱病羸弱
即與軍司選擇給糧放還行人之家委州縣優卹所到宣
撫稱朕意焉

答源乾曜等請封禪手詔

夫登封之禮告禪之儀蓋聖人之能事明王之盛業也朕以眇身託王公之上夙夜祗懼恐不克勝幸賴羣公以保宗社至於休徵符瑞皆先帝遺愛朕何賴焉豈可以禮百神覲羣后備岱亭之禮展封祀之儀者哉雖誠請是違而宿心未暇

答源乾曜等重請封禪手詔

夫理定然後制禮功成然後作樂朕承奉宗廟恐不克勝未能使四海乂安此理未定也未能使百蠻效職此功未

成也焉可以揚景化告成功雖欲答於神祇終候安於兆
庶再省誠懇惻怵良深

報裴濯等請封禪手詔

自中朝有故國步艱難天祚我唐大命集於聖真皇帝朕
承奉丕業十有餘年德未加於百姓化未覃於四海將何
以擬洪烈於先帝報成功於上元至若堯舜禹湯之茂躅
軒后周文之懿範非朕之能逮也其有日月之瑞風雲之
祥則宗廟社稷之餘慶也天平地成人和歲稔則羣公卿
士之任職也撫躬內省朕何有焉難違兆庶之情未議封

崇之禮

允行封禪詔

自古受命而王者曷嘗不封泰山禪梁父答厚德告成功
三代之前率繇斯義自魏晉已降迄至周隋帝典闕而大
道隱王綱弛而舊章缺千載寂寥封崇莫嗣物極而復天
祚我唐武文二后應圖受籙洎于高宗重光累盛承至理
登介邱懷百神震六合紹殷周之統接虞夏之風中宗宏
懿鑠之休睿宗穆粹清之道巍巍蕩蕩無得而稱者也朕
昔戡多難稟略先朝虔奉慈旨嗣膺丕業是用創九廟以

申孝敬禮二郊以展嚴禋寶菽粟於水火捐珠玉於山谷
兢兢業業非敢追美前王日慎一日實以奉遵遺訓至於
巡狩大典封禪鴻名顧惟寡薄未遑時邁十四載於茲矣
今百穀有年五材無眚刑罰不用禮義興行和氣氤氲淳
風淡泊蠻夷戎狄殊方異類重譯而至者日月於闕庭奇
獸神禽甘露醴泉窮祥極瑞者朝夕於林籞王公卿士罄
廼誠於中鴻生碩儒獻其書於外莫不以神祇合契億兆
同心斯皆烈祖聖考垂裕餘慶故朕得荷皇天之景祐賴
祖廟之介福敢以眇身而顙其讓是以敬承羣議宏此大

猷以光我高祖之丕圖以紹我太宗之鴻業永言陟配祇
感載深可以開元十三年十一月十日式遵故實有事泰
山所司與公卿諸儒詳擇典禮預爲備具勿廣勞人務存
節約以稱朕意所緣封禪儀注兵馬陪集並皆條奏布告
遐邇

將封泰山斷屠詔

自古明王仁及萬物今助天蓐育方將告成其緣祀祭及
在路供頓犧牲餼牢禮不可闕除此之外天下諸州並令
斷屠及漁獵採捕駕迴至京都依常式

禁濫借魚袋詔

朱紫貴服所以分別班品自非有德有功不可輕爲賞借
自今以後諸軍節度大使灼然有知功勞須權行給賞任
量借色及魚袋仍俱狀奏

定犯盜人刑法詔

大德曰生至重曰命緬觀前典惟刑是恤比來犯盜先決
一百雖非死刑大半殞斃言念于此良用惻然自今已後
抵罪人合杖勅杖者並宜從寬決杖六十一房家口移隸
磧西其嶺南人移隸安南江淮南人移隸廣府劔南人移

隸姚舊州其磧西姚舊安南人各依常式布告遐邇使知
朕意

賜兵士葬祭詔

陽和布氣庶物萌芽仁者用心無遺枯朽自開元元年以
來諸軍兵士殞歿骸骨不歸墳壠者宜令軍使爲造棺遞
送本貫委州縣府助其埋殯河曲隴外往歲戰場殂歿無
歸陰雨猶哭言念於此良用惻然亦委朔方隴右河西節
度使聚斂骸骨就高燥處同葬祭以酒脯高大築墳使久
遠標識

量助長征家口營種詔

乘塞守邊義不可輟遠征久戍人亦告勞朕身處九重心
在四遠因時遇物無日不思亭障有行役之勤室家無杼
軸之用不少優恤何以爲安方春發生須急農事其諸軍
長征人家單貧乏無力者宜令本管州縣勸率其家助其
營種使有秋望

放免十二年以前積欠詔

元率地稅以置義倉本防儉年賑給百姓頻年不稔逋租
頗多言念貧人將何以濟今獻春布澤務叶時和自開元

十二年閏十二月以前所有未納懸欠地稅宜放免

戒州縣祇候御史詔

御史出使舉正不法身苟不正焉能正人如聞州縣祇迎相望道路牧宰祇候僮僕不若作此威福其正人何自今以後宜申明格勅不得更爾違者州縣科罪御史貶降

禁訴冤自刑詔

身體髮膚受之父母不合毀傷比來有訴競之人即自刑害耳目自今以後犯者先決四十然後依法

幸孔子宅遣使以太牢祭墓詔

孔宣父誕聖自天垂範百代作王者之師表開生人之耳目朕增封岱岳迴鑒泗濱思闕里之風想雩壇之詠過矣遺烈慨然永懷式遵祀典用申誠敬宜令禮部尚書蘇頌以太牢致祭仍令州縣以時祀享復近墓五戶長供掃除巡理滯獄詔

孟夏麥秋尚決小罪況天時漸熱深愍繫囚宜令中書門下巡城內囚徒量事處置畿甸徒囚赤縣縣令疏理斷決勿滯禁人

禁左道詔

如聞道俗之間妄有占筮誑惑士庶假說災祥兼託符咒
遂行左道先令禁斷不合更然仍慮愚下未能悛改宜令
所司申明格勅嚴加訪察

順時決獄詔

時屬正陽事殷蠶穡愍彼囹圄或多冤濫宜宏愼恤之恩
俾助生育之德其所有囚徒除死囚已外所司長官即疏
決處分

給年滿兵募程糧詔

朕爲人父母撫有海內以百姓爲心恐一夫失所至於兵

募尤令存卹去給行賜還給程糧以此優矜不合辛苦如
聞比來兵募年滿者皆食不充腹衣不蔽形馱幕什物散
落略盡既不能致使流浪不歸丁壯減耗實繇於此自今
已後諸鎮兵募每準額至交替時所司預簡勘兩月前奏
聞當差御史分道簡察若涉欺隱委御史彈奏其有衣資
盡者量以逃死兵衣給三兩軍使得支濟如病患者遞給
驢乘令及伴侶

遣官祭五嶽四瀆風伯雨師詔

五嶽視三公之位四瀆當諸侯之秩載於祀典亦爲國章

方屬農功頗增旱暵虔誠徒積神道未孚用申靡愛之勤
冀通能潤之感宜令工部尚書盧從愿祭東嶽河南尹張
敬忠祭中嶽御史中丞兼戶部侍郎宇文融祭西嶽及西
海河瀆太常少卿張九齡祭南嶽及南海黃門侍郎李嵩
祭北嶽右庶子何鸞祭東海宗正少卿鄭繇祭淮瀆少詹
事張晤祭江瀆河南少尹李暉祭北海及濟瀆且潤萬物
者莫先乎雨動萬物者莫先乎風眷彼靈神是稱師伯雖
有常祀今更陳祈宜令光祿卿孟溫祭風伯左庶子吳兢
祭雨師各就壇壝務加崇敬但羞蘋藻不假牲牢應緣奠

祭尤宜精潔

遣使宣慰懷鄭許滑衛等州詔

朕撫有天下寅畏上元思保太和用康庶類頃秋夏之際
水潦不時懷鄭許滑衛等州皆遭泛溢苗稼潦漬屋宇傾
摧有切納隍之憂良深在予之責宜令右監門衛將軍知
內侍省事黎敬仁速往宣慰如有遭損之處應須營助賑
給並委使與州縣相知量事處置及所在堤堰不穩便者
簡行其利害奏聞

遣使宣撫河南北道詔

頃秋夏之間水潦方降閭閻損壞稼穡漂淪嘗恐一物之
違況乃數州之弊故發中使巡于外臺章奏屢聞州鄉稍
輯朕視之如子若納諸隍于再于三情猶馭朽審求人瘼
更遣信臣中丞兼戶部侍郎宇文融忠文竭誠夙夜匪懈
當安人之任有利簡之能眷彼使乎宜膺其選可往河南
河北道遭水諸州宣撫仍審察有不支濟者宜更量加賑
貸若屋宇損壞牛畜俱盡及征人之家不能自存立者量
事助其修葺其有官吏縱捨賑給不均亦須糾正回日奏
聞

令都督刺史更訪擇舉人詔

朕夢想賢才咨謀列嶽遂因封祀發詔搜揚昨所臨御道
場親加策問不稱所薦其數則多乃聞膏粱之人遞相招
致邱園之俊罕見褒升豈朕勞求之意也宜令都督刺史
審更訪擇具以名薦

答寧王憲手詔

開府儀同三司兼太常卿寧王憲秉德夷遠體道淳深頃
以茂親典司宗社禮經之文旣備鍾律之度已和成而不
居謙以自牧固辭兼領情所重違宜遂雅懷俾停劇務

安存流民詔

近聞河南宋沛等州百姓多有汭流逐熟去者須知所詣
有以安存宜令本道勸農事與州縣檢責其所去及所到
戶數聞奏

貶陳州刺史李樂詔

陳州刺史李樂詐盜受贓其數甚廣法司斷死國有常刑
時屬發生特申寬典宜免死貶爲欽州道化縣尉員外置
長任

賑給同鄜等州詔

同州鄜州近屬霖雨稍多水潦爲害念彼黎人載懷憂惕
宜令侍御史劉彥回乘傳宣慰其有百姓屋宇田苗被漂
損者量加賑給

緩逋賦詔

河南河北諸州去年緣遭水潦雖頻加賑貸而恐未小康
言念于茲無忘鑒寐爰自春夏雨澤以時兼聞夏苗非常
茂好旣即收穫不慮少糧然以產業初營儲積未贍若非
寬惠不免艱辛其貸糧麥種穀子迴轉變造諸色欠負等
並放候豐年以漸徵納蠶麥事畢及至秋收後並委刺史

縣令專勾當各令貯積勿使妄有費用明加曉諭知朕意
焉

遣使宣撫河北詔

河北州縣水災尤甚言念蒸人何以自給朕當寧興想有
勞旰昃在予之責用軫于懷宜令所司量支東都租米二
十萬担賑給仍令魏州刺史宇文融充宣撫使便巡撫水
損應須優恤及合折免并存閭舍一事已上與州縣相知
逐穩便處置務從簡易勿致勞擾